

# Un logotipu pa **\*Compromisu** por Asturias

Estimada collacia / Estimáu collaciu:

Nestos meses de trabayu, la xente de Compromisu tuvimos organizándonos en conceyos, participando nes xuntes... conociéndonos un poco meyor. Aprovechando esi bagaxe, hemos dir consolidando'l proyectu y, nesi camín, entendemos que **ye'l momentu de fixar una imaxe** que nos represente. Dientro d'ella, **el logotipu ha ser un elementu nuclear**, la idea gráfica de lo que ye y de lo que quier ser Compromisu por Asturias.

Depués de valorar les opciones que teníemos pa escoyer un logotipu, **decidióse** en Xunta Nacional **que la mesma militancia de Compromisu participa directamente**, proponiendo y aprobando'l logotipu qu'ha representanos. Poro:

1. Esti procesu queda **abiertu a tola militancia** de Compromisu por Asturias.
2. Cada militante puede presentar **toles propuestes que quiera**.
3. Cada militante **puede pidir ayuda** (idees, asesoramientu gráficu, etc.) a persones espertes de la so confianza, siempre y cuando les propuestes finales que s'entreguen tengan **l'autoría de les/los militantes** de Compromisu por Asturias.
4. La Executiva recueye les propuestes **hasta'l 21 d'ochobre a les 23.59 h.** en [contactu@compromisu.com](mailto:contactu@compromisu.com).
5. La Executiva va **comprobar** que les propuestes cumplan les condiciones técniques y, n'aprobándoles, va llevales a la Xunta Nacional viniente pa **pasar a votación d'escoyeta**.
6. La votación d'escoyeta del logotipu va facese **en rondes eliminatories** hasta quedar en 3 propuestes na ronda final, ganando la más votada.
7. La Secretaría de Comunicación va encargase de facer les presentaciones o **soportes afayadizos** pa facer posible la votación d'escoyeta.
8. **El nome** de la ganadora (o'l ganador) **va asoleyase namás si ésta/ésti quier** qu'asina seya.
9. A la propuesta ganadora podrá proponese-y **dalguna adaptación** que se-y encargará a la persona proponente o a un/a diseñador/a propuestu/a pola organización.
10. **Condiciones técniques:**
  - 10.a. El diseñu habrá incluyir **la palabra Compromisu o una sigla** y habrá poder adaptase a los conceyos y a la organización nacional (Compromisu por Asturias, Compromisu por Uviéu, etc.).
  - 10.b. Habrá unviase nun formatu llibre **.png** o asemeyáu o, nel so casu, en **.jpg** o **.tiff**.
  - 10.c. Na escoyeta, la Xunta Nacional ha valorar:
    - 10.c.I. **La claridá, la composición y el desendolcu gráficu** de la propuesta.
    - 10.c.II. **La facilidá y la economía de la so reproducción** en soportes estremaos.
    - 10.c.III. La capacidá de **tresmitir sintéticamente'l nuesu proyectu** políticu.